

**VENDIM**  
**Nr. 824, datë 30.12.2025**

**PËR PËRCAKTIMIN E RASTEVE, KUSHTEVE DHE PROCEDURAVE TË  
MARRJES SË VENDIMIT PËR PËRFSHIRJEN E SUBJEKTIT NË REGJISTRIN E  
POSAÇËM TË SUBJEKTEVE TË PËRJASHTUARA NGA VEPRIMTARITË  
PRODHUESE TË ARMËVE DHE TË TEKNOLOGJIVE USHTARAKE**

Në mbështetje të nenit 100 të Kushtetutës dhe pikës 2, të nenit 34, të ligjit nr. 87/2024, “Për rregullimin e prodhimit, tregtimit, kërkimit dhe zhvillimit të armëve, pajisjeve dhe teknologjive ushtarake”, me propozimin e ministrit të Mbrojtjes, Këshilli i Ministrave

VENDOSI:

**I. DISPOZITA TË PËRGJITHSHME**

Neni 1  
**Objekti**

Ky vendim ka për objekt:

- a) përcaktimin e rasteve dhe kushteve për përfshirjen në Regjistrin e Posaçëm të Subjekteve të Përfshirë (në vijim “Regjistri”) të individëve apo të subjekteve juridike, që kanë shkelur dispozitat ligjore dhe nënligjore në fushën e industrisë së mbrojtjes, që përbëjnë kërcënim për sigurinë kombëtare ose që janë të sanksionuara nga organizatat ndërkombëtare për transaksione financiare apo operacione tregtare, në kundërshtim me legjislacionin kombëtar e ndërkombëtar;
- b) përcaktimin e procedurave administrative për përfshirjen dhe heqjen e subjekteve nga Regjistri, duke garantuar një proces të drejtë, të qartë e të hapur në çdo fazë të tij;
- c) ngritjen, administrimin dhe mirëmbajtjen e Regjistrit nga Agjencia e Industrisë së Mbrojtjes (në vijim AIM) për qëllime institucionale të administratës publike, me synim pasqyrimin dhe përditësimin e vazhdueshëm të listës së individëve e të subjekteve juridike të përfshirë.

Neni 2  
**Qëllimi**

Ky vendim ka për qëllim të garantojë sigurinë kombëtare dhe përputhshmërinë me detyrimet ndërkombëtare të Republikës së Shqipërisë, nëpërmjet krijimit të një mekanizmi transparent dhe efektiv për identifikimin, përfshirjen e publikimin e individëve e të subjekteve, që përfshihen në Regjistrin e Posaçëm të Subjekteve të Përfshirë.

Neni 3  
**Përkufizime**

Në kuptim të këtij vendimi, termat e mëposhtëm kanë këto kuptime:

1. **“Subjekt i përfshirë”**, çdo individ ose subjekt, i licencuar, në fazë licencimi ose edhe pa licencë në Republikën e Shqipërisë, i cili ka shkelur dispozitat ligjore dhe nënligjore në fuqi për industrinë e mbrojtjes, që përbën kërcënim për sigurinë kombëtare ose është i sanksionuar nga

organizatat ndërkombëtare për kryerjen e transaksioneve financiare e të operacioneve tregtare, në kundërshtim me legjislacionin kombëtar e ndërkombëtar, për të cilin është marrë vendimi për përjashtim.

2. “Shkelje ligjore”, çdo veprim apo mosveprim i kryer në kundërshtim me dispozitat ligjore në fuqi për rregullimin e prodhimit, tregtimit, kërkimit zhvillimit të armëve, municioneve, pajisjeve dhe teknologjive ushtarake e çdo akt tjetër ligjor të aplikueshëm në fushën e industrisë së mbrojtjes.

3. “Kërcënim për sigurinë kombëtare”, çdo rast që i referohet veprimeve ose lidhjeve të subjekteve të përjashtuara, që mund të rrezikojnë ose cenojnë sigurinë kombëtare e ndërkombëtare përmes veprimtarive të tyre, përfshirë këtu edhe aktivitete në fushën e terrorizmit ose krimin të organizuar.

## II. KUSHTET DHE RASTET E PËRFSHIRJES

### Neni 4

#### **Rastet dhe kushtet e përfshirjes në Regjistër**

1. Në Regjistër përfshihen subjektet e licencuara, subjektet në proces licencimi, si dhe çdo subjekt fizik apo juridik që operon në sektorin e mbrojtjes, kur plotësojnë një ose më shumë nga rastet e mëposhtme:

a) Cenojnë sigurinë kombëtare të Republikës së Shqipërisë;

b) Veprimtaria, sjellja ose statusi i tyre përbën rrezik real, të vazhdueshëm ose të përsëritur për sigurinë kombëtare, rendin publik, integritetin e industrisë së mbrojtjes ose përmbushjen e detyrimeve ndërkombëtare;

c) Dështojnë të ndërmarrin masa korrigjuese ose nuk bashkëpunojnë me Agjencinë për sqarimin apo eliminimin e rrethanave që kanë çuar në identifikimin e shkeljes.

2. Përfshirja në Regjistër bëhet kur plotësohen një ose më shumë nga kushtet e mëposhtme:

a) Ekzistojnë të dhëna të verifikueshme dhe të dokumentuara, që provojnë përfshirjen e drejtpërdrejtë të subjektit në veprime ose mosveprime, që komprometojnë interesat themelore të mbrojtjes së Republikës së Shqipërisë;

b) Subjekti është përfshirë në listat e sanksioneve ndërkombëtare të miratuara nga Organizata e Kombeve të Bashkuara (OKB), Bashkimi Evropian (BE), NATO-ja ose partnerë të tjerë strategjikë;

c) Subjekti është përfshirë në listën e personave të shpallur si financues të terrorizmit në Shqipëri, me vendim të Këshillit të Ministrave;

ç) Ekziston një vendim gjyqësor i formës së prerë ndaj anëtarëve të Asamblesë së Aksionarëve për kryerjen e veprave penale, që lidhen me fushën e mbrojtjes, përfshirë krime kundër shtetit, rendit kushtetues, pavarësisë, krime kundër njerëzimit, vepra me qëllime terroriste apo që cenojnë marrëdhëniet ndërkombëtare;

d) Këshilli i Ministrave ka miratuar një vendim për përjashtimin e subjektit për arsye të interesit publik, sigurisë kombëtare ose për përmbushjen e detyrimeve ndërkombëtare të Republikës së Shqipërisë.

## III. PROCEDURAT ADMINISTRATIVE

### Neni 5

## **Procedura**

1. Agjencia e Industrisë së Mbrojtjes kryen verifikimet e nevojshme dhe njofton paraprakisht subjektin, vendas ose të huaj, për faktet e konstatuara dhe arsyet e mundshme të përjashtimit. Komunikimi bëhet me shkrim, në gjuhën shqipe ose në një gjuhë të huaj, të përcaktuar, rast pas rasti, dhe i jepet subjektit një afat jo më pak se 5 (pesë) ditë kalendarike për të paraqitur pretendimet e tij me shkrim.

2. Pas administrimit të pretendimeve sipas pikës 1, të këtij neni, Agjencia e Industrisë së Mbrojtjes ka një afat prej 15 (pesëmbëdhjetë) ditësh kalendarike për të marrë vendimin për përfshirjen ose jo të subjektit në Regjistrë.

3. Vendimi përfshin:

- a) të dhënat identifikuese të subjektit;
- b) përshkrimin e shkeljes;
- c) bazën ligjore ku mbështetet masa;
- ç) kohëzgjatjen e masës;
- d) të drejtën e subjektit për ankimin administrativ.

4. Vendimi hyn në fuqi menjëherë dhe i njoftohet subjektit dhe Ministrisë së Mbrojtjes.

5. Vendimi publikohet në faqen zyrtare të Agjencisë së Industrisë së Mbrojtjes dhe të Ministrisë së Mbrojtjes.

6. Subjekti i përjashtuar ka të drejtë të paraqesë kërkesë për rishqyrtim të masës nga data e hyrjes në fuqi të saj, duke bashkëngjitur prova për ndryshimin e rrethanave që kanë çuar në marrjen e vendimit.

7. Agjencia e Industrisë së Mbrojtjes, me vendim të arsyetuar, vendos heqjen e subjektit nga Regjistri kur provohet se kushtet që çuan në përjashtim kanë ndryshuar ose janë zhdukur.

8. Vendimi për heqjen nga Regjistri i komunikohet subjektit dhe publikohet në faqen zyrtare të Agjencisë së Industrisë së Mbrojtjes dhe të Ministrisë së Mbrojtjes.

### **Neni 6**

#### **Autoriteti përgjegjës për Regjistrin**

1. Agjencia e Industrisë së Mbrojtjes është organi përgjegjës për administrimin e Regjistrit, në përputhje me dispozitat e këtij vendimi dhe legjislacionin në fuqi.

2. Agjencia e Industrisë së Mbrojtjes mbikëqyr, siguron dhe është përgjegjëse për realizimin e të gjitha procedurave të regjistrimit dhe të përjashtimit të subjekteve, në përputhje me ligjin dhe parimet e transparencës, proporcionalitetit dhe mbrojtjes së interesave kombëtare.

3. Agjencia e Industrisë së Mbrojtjes shqyrton kërkesat për heqjen nga Regjistri të subjekteve, në përputhje me rastet dhe kushtet e përcaktuara nga ky vendim.

## **IV. REGJISTRI I SUBJEKTEVE TË PËRJASHTUARA**

### **Neni 7**

#### **Përmbajtja dhe publikimi i Regjistrit**

1. Regjistri përmban të dhëna për të gjitha subjektet e përjashtuara, të cilat kanë kryer veprimet për t'u konsideruar si të tilla, duke përfshirë informacion për:

a) numrin e identifikimit për personin tatimpagues (NIPT), emrin tregtar, të dhënat për pronësinë e subjektit dhe adresën e selisë;

b) të dhëna për sanksione ndërkombëtare të vendosura ndaj subjektit, nëse ka.

2. Regjistri publikohet në faqen zyrtare të Ministrisë së Mbrojtjes dhe të Agjencisë së Industrisë së Mbrojtjes.

3. Agjencia e Industrisë së Mbrojtjes kryen përditësimin e Regjistrit sa herë që ka ndryshime në statusin e subjektit.

## **V. PASOJAT DHE MJETET JURIDIKE**

### **Neni 8**

#### **Efektet e përjashtimit**

Me përfshirjen në Regjistër, subjektit të përjashtuar i ndalohej të ushtrojë çdo veprimtari, që lidhet me prodhimin, tregtimin, blerjen apo transferimin e produkteve dhe të teknologjive ushtarake, i anulohen ose i shfuqizohen, sipas Kodit të Procedurave Administrative, të gjitha licencat dhe autorizimet ekzistuese dhe i ndalohej aplikimi për licenca të reja.

### **Neni 9**

#### **E drejta e ankimit administrativ**

1. Brenda 30 (tridhjetë) ditëve kalendarike nga njoftimi i vendimit të Agjencisë së Industrisë së Mbrojtjes, subjekti i përjashtuar ka të drejtë të paraqesë ankim administrativ me shkrim pranë Komisionit të Ankimit Administrativ në Ministrinë e Mbrojtjes.

2. Paraqitja e ankimit administrativ pezullon ekzekutimin e vendimit, përveç rasteve kur Agjencia e Industrisë së Mbrojtjes vlerëson se zbatimi i menjëhershëm është i domosdoshëm për interesin publik, sigurinë kombëtare, rendin publik ose mbrojtjen e shëndetit publik, sipas parashikimeve të Kodit të Procedurave Administrative.

3. Komisioni i Ankimit Administrativ shqyrton ankimin dhe merr vendim të arsyetuar, brenda një afati jo më shumë se 30 (tridhjetë) ditë kalendarike nga paraqitja e tij.

4. Vendimi i Komisionit të Ankimit Administrativ i komunikohet subjektit dhe Agjencisë së Industrisë së Mbrojtjes dhe është i detyrueshëm për zbatim.

## **VI. DISPOZITA TË FUNDIT**

### **Neni 10**

#### **Institucionet që ngarkohen për zbatimin e vendimit**

Ngarkohen Ministria e Mbrojtjes dhe Agjencia e Industrisë së Mbrojtjes për zbatimin e këtij vendimi.

### **Neni 11**

#### **Hyrja në fuqi**

Ky vendim hyn në fuqi pas botimit në Fletoren Zyrtare.

KRYEMINISTËR

**Edi Rama**